

# HATINGGABI NG BUTIKI SA ESKINITA

mas malamig sa aking katawan  
ang palad ng inang naghihintay,  
mas malamig sa aking balat  
ang packing tape  
na ibinalot sa bangkay,  
mas malamig sa aking dugo  
ang sindak  
na nasa dilat na mata  
ng patay.

bukas ng gabi,  
sa muli kong pagbaba,  
madaraan ko ang dugong  
sumanib sa burak  
na nawa'y hindi ko malasahan  
sa aking paghalik sa lupa.

bukas ng gabi,  
sa muli kong pagbaba,  
kasabay ng aking pagtiktik,  
sana'y maratnan sila  
ng katarungang  
lagi ko ring hinihintay.